

**MESYUARAT PERTAMA PENGGAL KETIGA
DEWAN UNDANGAN NEGERI PULAU PINANG
YANG KEEMPAT BELAS
17 APRIL 2020**

PERKARA: 5(B)(XXIII)4

**SOALAN BERTULIS OLEH AHLI KAWASAN TELOK AYER TAWAR
YB. MUSTAFA KAMAL BIN AHMAD**

4. Sila nyatakan apakah perkembangan terkini IKS di Negeri Pulau Pinang?
 - (a) Sila nyatakan apakah insentif dan bantuan serta bimbingan yang dilakukan oleh Kerajaan Negeri bagi membantu usahawan IKS di Negeri Pulau Pinang?

**YB. DATO' IR. HAJI AHMAD ZAKIYUDDIN BIN ABD. RAHMAN
MENJAWAB BAGI PIHAK Y.A.B. KETUA MENTERI**

4. Perkembangan Industri Kecil Sederhana (IKS) di Pulau Pinang dilihat semakin meningkat di mana kini lebih ramai usahawan IKS menggunakan platform internet melalui aplikasi media sosial seperti Facebook dan Instagram bagi memperkenalkan dan memasarkan produk masing-masing dan cara ini secara tidak langsung turut membantu dalam meningkatkan pendapatan mereka.

Selain itu lebih ramai usahawan IKS kini menggunakan sistem E-Wallet dalam perniagaan masing-masing selaras dengan Revolusi Perindustrian 4.0.

Usahawan-usahawan IKS adalah digalakkan untuk lebih peka dengan perkembangan teknologi selaras dengan Revolusi Perindustrian 4.0 bagi menjana pendapatan serta memasarkan produk di pasaran antarabangsa.

- (a) Kerajaan Negeri melalui PDC sentiasa memberi penekanan terhadap kemajuan IKS di Pulau Pinang secara berterusan. Selaras dengan usaha itu, antara inisiatif kerajaan negeri untuk membantu usahawan IKS adalah seperti berikut:

- (i) Mengadakan Kursus/ Seminar/ Taklimat yang kebanyakannya adalah percuma kepada usahawan IKS bagi membantu mereka dalam melengkapkan diri dengan pengetahuan serta kemahiran bagi memperkembangkan perniagaan mereka. Di antara kursus/ seminar/ taklimat yang diadakan adalah seperti taklimat berkaitan E-Wallet, kursus berkaitan E-Marketing dan Bengkel Industri 4.0.
- (ii) Penyertaan dalam program-program Perdagangan & Keusahawanan yang diadakan di dalam dan luar negara dengan melibatkan usahawan untuk turut serta bagi membolehkan mereka menimba ilmu pengetahuan serta pengalaman di samping dapat memperkenalkan serta mempromosikan produk produk usahawan IKS di dalam dan luar negara. Di antara program yang telah disertai sepanjang tahun 2019 adalah seperti program Medan Fair di Pekan Raya Sumatera Utara, Malaysia Fest di Bangkok dan Karnival Usahawan Desa di Putrajaya.
- (iii) Menganjurkan program berbentuk Pepadanan Perniagaan ("*Business Matching*") dengan penyertaan usahawan dalam dan luar negara bertujuan memberi peluang kepada usahawan untuk membina jaringan perniagaan serta menembusi pasaran luar. Di antara program pepadanan perniagaan yang dianjurkan oleh PDC sepanjang tahun 2019 adalah seperti di Pekan Raya Sumatera Utara kali ke-48 sewaktu program Medan Fair berlangsung dan Program Busines Matching (Malaysia-Indonesia) di Hotel Wembley St Giles, Pulau Pinang.
- (iv) Mewujudkan bantuan pinjaman mudah melalui Skim Pinjaman Harapan (SPH) Negeri Pulau Pinang yang dahulunya dikenali sebagai Projek Titian Saksama Rakyat (PTSR) yang merupakan program Kerajaan Negeri bersama PDC untuk membantu mewujudkan satu sistem penyaluran modal tambahan yang mudah dan tidak membebankan usahawan. Melalui modal

tambahan ini, usahawan-usahawan kecil dapat mengembangkan perniagaan mereka serta secara tidak langsung ianya dapat memupuk semangat usahawan dalam membantu meningkatkan taraf hidup mereka.